

佛曆二千九百五十八年九月謹錄

唐相裴休

龍猛菩薩

天親菩薩

沙門實賢

勸發菩提心文合刊

古閩翁守謙校印贈

有持戒修福者於此章句能生信心以此爲實當知是
人不於一佛二佛三四五佛而種善根已於無量千萬
佛所種諸善根若善男子善女人受持讀誦此文若爲
人輕賤是人先世罪業應墮惡道以今世人輕賤故先
世罪業卽爲消滅當得阿耨多羅三藐三菩提

三寶弟子翁守謙謹錄金剛經語

勸發菩提心文合刊序

學佛之目的。在証得無上菩提。故華嚴中善財南詢時。於各善知識所皆云。我已先發阿耨多羅三藐三菩提心。大日經住心品云。菩提心爲因。學佛者。不先發阿耨多羅三藐三菩提心。而能圓滿正覺者。無有是處。今日各經坊流通之發菩提心文。共有四種。一龍猛菩薩所造。依金剛密乘。闡發勝義。行願三摩提者。二天親菩薩。三唐相裴休。所造斯二本。於菩提心之體相業用。闡發綦詳。四明省庵法師所造。特爲出家衆說明。必發菩提心之所由。哀懇迫切。讀此而不能發心者。吾斷其必非出家兒矣。此四本勸發菩提心文。雖被機立義。各有不同。而勸初心學佛者。必先發菩提心。

則無以異。獨惜別本單行未有合而刊之者。俾見顯密大小發心之異同。互相觀摩以同至於果海。有翁守謙居士者。既研讀四本論文而發心。復感顯密大小之各有所偏。而不能觀其通。故發心合刊斯本。以公同好。予欽其以平等心。而宏正法。無所偏倚。允稱爲已發菩提心者。故樂書數言而爲之序。

辛未九月雉水沙門常惺序於北平柏林寺

若是文經典所在之處
即爲有佛若尊重弟子

勸發菩提心文合刊自序

普勸僧俗同發菩提心。必須彙刻論文諸經。莫妙於

龍猛天親

二菩薩及

唐相裴休沙門實賢

勸發菩提心之論文。以其易於參考研究。實皆寶

筏慈航。不可思議。但譯發菩提之論文。卷帙浩繁。皆不易得。因彙刊此四大菩薩之論文。以便課誦。要在閱讀後。共同發願施行。蓋不讀龍猛菩薩首造發菩提心論。不能得勝義。行願三摩地爲戒。不讀天親菩薩續造十二品發菩提心論。不能得大誓願。及六波羅蜜。如實法門之功德持。不讀唐相裴休。再造勸發菩提心文。不能得三心五誓。積集福德。明發菩提功德。不讀沙門實賢。又造勸發菩提心文。不能得真正圓大。八法週知。十種

因緣。廣大之利益也。守謙編探論文。考覈校正。輯成此本。爲晨夕省閱修行之本。文真論正。不敢自私。合刊流傳。俾得廣布。使世之在家出家。欲入佛門。造佛境者。宜信受奉行。

佛曆二千九百五十八年
中華民國二十年雙十節

古閩翁守謙自識於北平晚覺庵

善惡之報 如影隨形
三世因果 循環不停
此生空過 靈性沈淪
盼望同志 急早修行
編者奉勸

菩提心十戒 十二願文

一 殺_偷生

二 偷盜

三 邪淫

四 妄言

五 惡口

六 兩舌

七 綺語

八 貪欲

九 瞋恚

十 愚癡

此為身三業

此為口四業

此為意三業

附菩提心十戒 十二願文

一

能為戒此十惡即生十善

十二願文

願	天	常	生	好	人	願	人	常	修	善	行
願	社	會	除	惡	習	願	國	家	致	太	平
願	各	國	無	凶	歲	願	世	界	無	流	氓
願	衆	生	無	苦	惱	願	大	地	無	戰	爭
願	人	人	亨	壽	考	願	個	個	遂	生	成
願	諸	冥	得	普	度	願	大	道	日	昌	明

錄善提心戒釋義願文

勸發菩提心文

唐相裴 休

古閩翁守謙校

普勸僧俗同發菩提心

普告大衆若僧若俗。有能同發阿耨多羅三藐三菩提心者。我願生生常爲道俗。同宗同趣。同願同求。同運大悲。同修大智。遞相輔助。直至菩提。普告大衆若僧若俗。有能同發阿耨多羅三藐三菩提心者。我願生生常同淨業。各領眷屬。分化衆生。龍華會中。同受佛記。廣修大願。直至菩提。

初明菩提名義

阿耨多羅三藐三菩提者。此云無上正徧知覺。無上者究竟也。正者如理智徧者無量智。正覺

唐相裴 休勸發菩提心文

知真。是諸佛所證最上妙道。是衆生所迷根本妙源。既慕如來永離諸苦。自悲己身久失大利。慨然奮發。將求佛身。卽是初發阿耨多羅三藐三菩提心也。

次明菩提心體

既發菩提大心。須識菩提心體。夫菩提心體。不從真心發。無由得至菩提。故須揀擇分明。方是正因法行。且大衆從無始來常認爲我身者。是地水火風假合之身。旋聚旋散。屬無常法。非我身也。大衆從無始來常認爲我心者。是緣慮客塵虛妄之心。乍起乍滅。屬無常法。非我心也。我有真身。圓滿空寂者是也。我有真心。廣大靈知者是也。圓滿者。法身無量功德本。自具足也。空寂者。本身離諸色相。永無動搖也。廣大者。真心體兼法界。包含虛空也。靈知者。了了分明。照澈也。空寂靈知。神自在。

性含萬德。體絕百非。如淨月輪。圓滿無缺。惑雲所覆。不自覺知。妄惑既除。真心本淨。十方諸佛。一切衆生。與我此心。三無差別。此即菩提心體也。捨此不認。而認自身妄念。隨死隨生。與禽畜雜類。比肩受苦。爲丈夫者。豈不羞哉。旣發無上道心。當行大丈夫事。起三心。立五誓。修一切助菩提法。以諸佛爲師。以菩薩爲侶。以六道衆生爲眷屬。以生死煩惱爲園林。誓盡未來濟拔度脫。是則名爲發阿耨多羅三藐三菩提心也。

次明三心

一者大悲心。旣悟自心本無生滅。遂悲六道枉受沈淪。己雖未證菩提。且願衆生解脫。即經云。菩提心。己雖未度。願度未度。老子云。聖人後其身。先其身。儒家云。仁者博施濟衆。先人後己。三教皆同。於是廣發同體大悲。盡未來行四攝法。攝彼衆生。皆令歸眞。同成佛道。此

即大悲心也。二者大智心。既興大悲。誓度羣品。品類既多。根器不同。即須廣事諸佛。廣學妙法。一一證入。轉化衆生。此即大智心也。三者大願心。既欲廣度衆生。遂興廣大悲智。然心雖本淨。久翳塵勞。習性難頓銷除。法器須資磨練。自慮輪迴諸趣。不遇佛法勝緣。故發大願。備修萬行。行願相資。猶如車翼。運行不退。直至菩提。此即大願心也。華嚴經云。菩提心燈。以光爲然三心之中。大願爲主。當持悲智以度羣生。故初發心。必先起願。華嚴行願經云。若人臨命終時。最後剎那。一切諸根悉皆散壞。一切親屬悉皆捨離。一切威勢悉皆退失。一切財寶無復相隨。唯此願王不相捨離。常爲引導。直至菩提。是故汝等聞此願王。莫生疑念。華嚴最後普賢所說。定非虛妄。依此修行。

次明五誓

一者衆生無邊誓願度。二者福智無邊誓願集。三者佛法無邊誓願學。四者如來無邊誓願事。五者無上正覺誓願成。持此五誓。念念運心。無有間斷。是爲具菩提大心。是爲持菩提心戒。三心五誓。重疊相資。佛佛道同。不過於此。即是具足發阿耨多羅三藐三菩提心也。

次勸常持菩提心

普告大衆。若僧若俗。旣已發菩提大心。修菩薩妙道。至誠普啓諸佛。一心普攝衆生。行住坐臥。常持此願。不欺誑於六道。不失信於如來。廣設津梁。護持教法。彌勒座下。皆證無生。千佛會中。俱爲導首。能持此心。則永不退失。阿耨多羅三藐三菩提。

次勸度脫衆生

唐相裴 休勸發菩提心文

普告大衆。若僧若俗。從今身至佛身。誓欲度脫一切衆生。普令入佛知見。黑闇岸下。爲作明燈。生死海中。爲作船筏。力雖未及。常運此心。念念相續。不令間斷。能持此心否。若持此心。則永不退失。阿耨多羅三藐三菩提。

次勸積集福德

普告大衆。若僧若俗。從今身至佛身。誓欲於悲田敬田。積集福德。亦捨內財外財。成就萬行。本爲衆生修道。須資福德勝緣。令無弘己之心。欲受天人之報。力雖未及。常運此心。念念相續。不令間斷。能持此心否。若持此心。則永不退失。阿耨多羅三藐三菩提。

次勸修學佛法

普告大衆。若僧若俗。從今身至佛身。誓欲修一切佛法。窮一切教門。四無

量心。六波羅密。法義深淺。因果有無。性相二宗。頓漸二教。悉皆通達。開導衆生。力雖未及。常運此心。念念相續。不令間斷。能持此心否。若持此心。則永不退失。阿耨多羅三藐三菩提。

次勸親事諸佛善知識

普告大衆。若僧若俗。從今身至佛身。誓欲承事諸佛。一切諸大菩薩。諸善知識。見善知識。情無厭足。事善知識。心無疲懈。聞善知識。所有教誨。欣樂順行。常學善財童子所行之行。力雖未及。常運此心。念念相續。不令間斷。能持此心否。若持此心。則永不退失。阿耨多羅三藐三菩提。

次勸修唯求佛果

普告大衆。若僧若俗。從今身至佛身。常願當來作佛。不起二乘之心。願普

與一切衆生同體速成正覺。所修善業。一一回向阿耨多羅三藐三菩提。所勸衆生。一一令發無上道意。常修寶海梵志。廣大悲願。力雖未及。常運此心。念念相續。不令間斷。能持此心否。若持此心。則永不退失阿耨多羅三藐三菩提。

次勸結菩提道俗

普告大衆。若僧若俗。從今身至佛身。與同發菩提心道俗。生生世世不相捨離。同願同心。同行同德。各修定慧。分化衆生。或爲兄弟。或爲師長。迭相勸發。彼此護持。一人失路。即同拯拔。一人證道。即共歸依。永無厭倦。不相捨離。能持此心否。若持此心。則永不退失阿耨多羅三藐三菩提。

次勸通圓頓經典

普告大衆。若僧若俗。旣已發菩提大心。運菩提大行。若不徹菩提心體。未合菩提法源。雖已發心。必滯權小。故須先悟圓明淨覺。本無無明。幻翳空華。俱非實體。遠離執取。平如虛空。常於寂照心中。流出廣大悲智。如此。則不滯諸相。不墮二邊。始爲菩提正因。方免枉受勞苦。若金剛圓覺。簡妙通明。華嚴涅槃。廣大具足。儻同我志。並望通經。

次明一切助菩提法

寶海梵志。勸無量人發阿耨多羅三藐三菩提心。取佛世界。皆得受記。復勸三億弟子。令其發心。中有一人。名曰樹提。白言尊者。云何菩提。云何助菩提法。云何菩薩修行菩提。云何繫念得於菩提。爾時其師報言。菩提者。即是菩薩之所修集。四無量藏。所謂無盡福德藏。無盡智藏。無盡慧藏。無

盡佛法和合藏。是名菩提。如佛所說助菩提法。所謂攝取清淨度生死法門。善男子。捨財是助善法提。調伏衆生故。持戒是助善提法。隨其所願得成就故。忍辱是助善提法。三十二相八十隨形好具足故。精進是助善提法。具足一切諸事故。禪定是助善提法。其心當得善調伏故。智慧是助善提法。知一切諸煩惱故。多聞是助善提法。得無礙辨故。福德是助善提法。一切衆生之所須故。思惟是助善提法。成就斷疑故。慈心是助善提法。成就無礙心故。悲心是助善提法。教化衆生無厭足故。喜心是助善提法。於正法中生愛樂故。捨心是助善提法。成就斷於愛憎故。聽法是助善提法。成就滅五蓋故。出世是助善提法。捨除一切世間故。阿蘭若是助善提法。滅不善業故。隨喜是助善提法。增長善根故。念處是助善提法。分別身受

心法成就故。正勤是助菩提法。離一切不善法。行一切善法故。如意足是助菩提法。成就身心輕利故。諸根是助菩提法。摧滅一切煩惱故。覺是助菩提法。覺如實法故。六和是助菩提法。調伏衆生令清淨故。是名攝取清淨度生死法門。如是修行。即繫念得菩提也。如是等菩提心。今應生欲。是道清淨。是道無漏。是道正直。是道安穩。汝等應當專心作大誓願。取莊嚴佛土。莊嚴佛土。各各不同也。或取淨土。或取穢土。具在悲華經中。

次明菩薩四懈怠法

寶藏如來告毗舍那無垢言。菩薩有四懈怠。若菩薩成就四法。於生死獄取諸苦惱。不能疾成阿耨多羅三藐三菩提。何等爲四。所謂下行。下伴。下施。下願。云何下行。或有菩薩破口身戒。不善護業。是名下行。云何下伴。親

近聲聞及辟支佛。共與同事。是名下伴。云何下施。不能一切捨諸所有。於受者中心生分別。爲得天上快樂。故而行布施。是名下施。云何下願。不能一心願取諸佛淨妙世界。所作誓願不能調伏衆生。是名下願。出悲華經

次明菩薩四速疾法

復有四法。菩薩成就。則能疾成阿耨多羅三藐三菩提。一者能持禁戒。淨身口意。護持法門行。二者親近修學大乘之人。與共同事。三者所有之物。能一切捨。以大悲心施於一切。四者一心願取種種莊嚴諸佛世界。亦爲調伏一切衆生。是名四法。出悲華經

次明發菩提心功德

天帝釋白法慧菩薩言。佛子。菩薩初發菩提心所得功德。其量幾何。法慧

菩薩言。此義甚深。難說。難知。難分別。難信解。難證。難行。難通達。難思惟。難度量。難趣入。雖然。我當承佛威神之力。而爲汝說。佛子。假使有人以一切樂具。供養東方阿僧祇世界所有衆生。經於一劫。然後教令淨持五戒。南西北方四維上下。亦復如是。此人功德。寧爲多否。天帝言。此人功德。唯佛能知。法慧言。此人功德。比菩薩初發心功德。百分不及一。千分不及一。百千分不及一。如是億分。百億分。千億分。百千億分。那由他億分。百那由他億分。千那由他億分。百千那由他億分。百萬那由他億分。乃至優波尼沙陀分。亦不及一。佛子。且置此喻。假使有人以一切樂具。供養十方十阿僧祇世界所有衆生。經於百劫。然後教令修十善道。於是供養。經於千劫。教住四禪。經百千劫。教住四無量心。經於億劫。教住四無色定。經百億劫。教

住須陀洹果。經於千億劫。教住斯陀含果。經於百千億劫。教住阿那含果。經於那由他億劫。教住阿羅漢果。經於百千那由他億劫。教住辟支佛道。是人功德寧爲多否。天帝言。此人功德。唯佛能知。法慧菩薩言。此人功德。比菩薩初發心功德。百分不及一。乃至優波尼沙陀分亦不及一。何以故。一切諸佛初發心時。不但爲以一切樂具供養十方十阿僧祇世界所有衆生。經於百劫。乃至百千那由他億劫。故發菩提心。不但爲教爾所衆生。令修五戒十善業道。教住四禪四無量四無色定。教得須陀洹果斯陀含果阿那含果阿羅漢果辟支佛道。故發菩提心。爲令如來種性不斷。故爲充徧一切世界。故爲度脫一切世界衆生。故爲悉知一切世界成壞。故爲悉知一切世界中衆生垢淨。故爲悉知一切世界自性清淨。故爲悉知一

一切衆生心樂煩惱習氣故。爲悉知一切衆生死此生彼故。爲悉知一切衆生諸根方便故。爲悉知一切衆生心行故。爲悉知一切衆生三世智故。爲悉知一切佛境界平等故。發於無上菩提之心。故常爲三世一切諸佛之所憶念。當得三世一切諸佛與其妙法。即與三世一切諸佛體性平等。已修三世一切諸佛助道之法。成就三世一切諸佛力無所畏。莊嚴三世一切諸佛不共佛法。悉得法界一切諸佛說法智慧。何以故。以是發心當得佛故。應知此人。即與三世諸佛同等。即與三世諸佛境界平等。即與三世諸佛功德平等。得如來一身無量身究竟平等。眞實智慧。初發心時。即爲十方一切諸佛所共稱歎。即能說法教化。調伏一切世界所有衆生。即能震動一切世界。即能光照一切世界。即能息滅一切世界。諸惡道苦。即能

嚴淨一切世界。即能於一切世界中示現成佛。即能令一切衆生皆得歡喜心。即能入一切法界性。即能持一切佛種性。即能得一切佛智慧光明。此初發心菩薩。不於三世少有所得。若諸佛。若諸佛法。若諸菩薩。若諸菩薩法。若猶覺。若猶覺法。若聲聞。若聲聞法。若出世間。若出世間法。若衆生。若衆生法。唯求一切智。於諸法界心無所著。是名初發阿耨多羅三藐三菩提心功德。出華嚴經發心功德品。此約初住菩薩說。今凡夫位中。是初發菩提心。至初住位中。是成就菩提心也。

次通凡聖差別疑

或曰菩提大心。聖賢境界。固非凡夫淺識所能造擬也。故菩薩初住。發大心。便能遊歷十方。廣作佛事。今以大法勸諸凡夫。無乃根器不同乎。對曰。不然。凡聖同源。本無差別。一念迷倒。自取沈淪。若悟性本圓明。便與諸佛

平等性上起菩提心。以此修行。即爲菩薩。菩薩者。大心衆生也。何苦自薄。而謂凡夫隔絕哉。且凡夫位中。三毒爲本。今旣誓捨財寶以化衆生。雖未盡行。自然少貪。誓行四攝以化衆生。雖未盡行。自然少瞋。誓修定慧以度衆生。雖未盡證。自然少癡。三法在心。便成法器。所以菩薩不斷煩惱。唯興大悲。威德法門。誠不虛設。又何疑而不爲哉。且凡夫發心。是初發菩提心也。初住發心。是成就菩提心也。若待初住方發此心。初住之前當修何法。除此菩提正路。盡爲生死因緣。但至輪回。何由證入。故釋迦如來從初發心。即於無量生中。事無量諸佛。一切佛所。發菩提心。直至然燈佛前。方受遠記。寶藏佛會。始號大悲。固須千百生中。方得成就。所以勸諸道俗。學我本師世尊。無以纒辨教門。便爲甚深法藏。蠱識心性。定言無上菩提。須度一切衆

生。須求一切種智。賢劫千佛。皆種善根。自然福智弘深。永作世間導首。普願大衆以此文示此郡及他州。與我有緣者。見此文。當發菩提心。欲發心時。請先隨力捨財物。或投一齋。供養三寶。或畫一像。精進道場。然後依此正文。虔敬大願。準賢劫千佛經。一一佛於因地遇佛時。皆先以財寶乃至柳枝淨水等供養世尊。然後發菩提心。悲華經寶海梵志。勸無量人天發菩提心。先令以物獻佛。然後啓願。佛同故須遵稟。啓發之後。念念運心。便爲成佛。正道因宜。自深加喜慶。道俗不乖於法侶。山川豈礙夫真智。幸因路人。垂示姓字。

勸發菩提心文終

若衆生心憶佛念佛
現前當來必定見佛

勸發菩提心論

金剛頂瑜伽中發阿耨多羅三藐三菩提心論

亦名爲瑜伽總持教門說菩提心觀行修持義

龍 猛 菩 薩 造

三藏沙門大廣智不空奉詔譯

古閩翁氏醒迷子守謙編 輯

大阿闍梨云。若有上根上智之人。不樂外道二乘之法。○有大度量。勇銳無惑者。宜修佛乘。○當發如是心。我今志求阿耨多羅三藐三菩提。不求餘果。○誓心決定。故魔宮震動。十方諸佛皆悉證知。○常在入天。受勝快

樂。所生之處。憶持不忘。○若願成瑜伽中諸菩薩身者。亦名發菩提心。○何者爲次。諸尊皆同大毗盧遮那佛身。○如人貪名官者。發求名官心。修理名官行。○若貪財寶者。發求財寶心。作經營財物行。○凡人欲爲善之與惡。皆先標其心。而後成其志。○所以求菩提者。發菩提心。修菩提行。○既發如是心已。須知菩提心之行相。○其行相者。三門分別。○諸佛菩薩。昔在因地。發是心已。○勝義行願。三摩地。爲戒。○乃至成佛。無時暫忘。○惟真言法中。即身成佛故。○是說三摩地法。於諸教中。闕而不書。

一者行願。二者勝義。三者三摩地。

初行願者。爲修習之人。常懷如是心。○我當利益安樂無餘有情界。觀十方含識。猶如己身。○所言利益者。爲勸發一切有情。悉令安住無上菩提。

○終不以二乘之法而今得度。○今真言行人。應知一切有情。皆含如來藏性。皆堪任安住無上菩提。○是故不以二乘之法。而今得度。○故華嚴經云。無一衆生而不具足眞如智慧。○但以妄想顛倒執着而不證得。○若離妄想。一切智。自然智。無礙智。則得現前。○所言安樂者。謂行人既知一切衆生畢竟成佛。故不敢輕慢。○又於大悲門中。尤宜拯救。○隨衆生願。而給付之。乃至身命而不吝惜。令其安存。使令悅樂。○既親近已。信任師言。因其相親。亦可教導。○衆生愚蒙。不可強度。真言行者方便引進。

第二勝義者。觀一切法無自性。○云何無自性。○謂凡夫執着名聞利養資生之具。務以安身。恣行三毒五欲。○真言行人。誠可厭患。誠可棄捨。○又諸外道等戀其身命。或助以藥物。得仙宮住壽。或復生天以爲究竟。○

眞言行人。應觀彼等。業力若盡。未離三界。○煩惱尙存。宿殃未殄。惡念施起。當彼之時。沈淪苦海。難可出離。○當知外道之法。亦同幻夢陽燄也。○又二乘之人。聲聞執四諦法。緣覺執十二因緣。○知四大五陰畢竟磨滅。深起厭離。破衆生執。○勤修本法。尅證其果。趣本涅槃。已爲究竟。○眞言行者。當觀二乘之人。雖破人執。猶有法執。但淨意識。不知其他。○久久成果位。以灰身滅智。趣其涅槃。○如太虛空。湛然常寂。○有定性者。難可發生。要待劫限等滿。方乃發生。○若不定性者。無論劫限。遇緣便迴心向太。○從化城起。以爲超三界。○謂宿信佛故。乃蒙諸佛菩薩加持力。而以方便力。遂發大心。○乃從初十信下徧歷諸位。經三無數劫。難行苦行。然得成佛。○旣知聲聞緣覺智慧狹劣。亦不可樂。○又有衆生。發大乘心。行菩

薩行。於諸法門無不徧修。○復經三阿僧祇劫。修六度萬行。皆悉具足。然證佛果。○久遠而成。斯由所習法教致有次第。今眞言行人如前觀已。○復發利益安樂無餘衆生界。一切衆生心。以大悲決定。永超外道二乘境界。○復修瑜伽勝上法人。能從凡入佛位者。亦超十地菩薩境界。○又深知一切法無自性。○云何無自性。前以相說。今以指陳。○夫迷途之法。從妄想生。乃至展轉。成無量無邊煩惱。輪迴六趣。○若覺悟已。妄想止除。種種法滅。故無自性。○復次諸佛慈悲。從眞起用。救攝衆生。○應病與藥。施諸法門。隨其煩惱。對治迷津。○遇機筏達於彼岸。法已應捨。無自性故。○如大毘盧遮那經云。諸法無相。爲虛空相。○作是觀已。名勝義菩提心。○當知一切法空已。悟法本無生。心體自如。○不見身心。住於寂滅平等究竟眞

實之智。令無退失。○妄心若起。知而勿隨。妄若失時。心源空寂。○萬德斯具。妙用無窮。○及所以十方諸佛。以勝義行願爲戒。○但具此心者。能轉法輪。自他俱利。○如華嚴經云。悲先慧爲主。方便共相應。信解清淨心。如來無量力。無礙智現前。自悟不由他。具足同如來。發此最勝心。○佛子始發生。如是妙寶心。則超凡夫位。入佛所行處。生在如來家。種族無瑕玷。與佛共平等。決成無上覺。○纔生如是心。即得入初地。心樂不可動。譬如大山王。○又准華嚴經云。從初地乃至十地。於地地中。皆以大悲爲主。○如無量壽觀經云。佛心者。大慈悲是。○又涅槃經云。南無純陀。身雖人身。心同佛心。○又云。憐愍世間大醫王。身及智慧俱寂靜。無我法中有真我。是故敬禮無上尊。○發心畢竟二無別。如是二心先心難。自未得度先度他。

是故我禮初發心。○初發已爲人天師。勝出聲聞及緣覺。如是發心過三界。是故得名最無上。○如大毗盧遮那經云。菩提爲因。大悲爲根。方便爲究竟。⊕第三言三摩地者。眞言行人如是觀已。云何能證無上菩提。當知法爾應住普賢大菩提心。一切衆生本有薩埵。爲貪瞋癡煩惱之所縛故。諸佛大悲。以善巧智。說此甚深秘密瑜伽。令修行者。于內心中。觀日月輪。由作此觀。照見本心。湛然清淨。猶如滿月光徧虛空。無所分別。亦名無覺了。亦名淨法界。亦名實相般若波羅密海。能含種種無量珍寶。三摩地猶如滿月。潔白分明。何者。爲一切有情悉含普賢之心。我見自心。形如月輪。何故以月輪爲喻。爲滿月圓明。體則與菩提心相類。凡月輪有一十六分。喻瑜伽中金剛薩埵。至金剛拳有十六大菩薩者。于三十七尊中五方

佛位各表一智也。東方阿閼佛。由成大圓鏡智。亦名金剛智也。南方寶生佛。由成平等性智。亦名灌頂智也。西方阿彌陀佛。由成妙觀察智。亦名蓮華智。亦名轉法輪智也。北方不空成就佛。由成成就所智。亦名羯磨智也。中方毗盧遮那佛。由成法界智爲本。已上四佛智。出生四波羅密菩薩焉。四菩薩。即金寶法業也。三世一切諸聖賢生成養育之母。于是印成法界體性中流出四佛也。四方如來各攝四菩薩。東方阿閼佛攝四菩薩。金剛薩埵。金剛王。金剛愛。金剛善哉。爲四菩薩也。南方寶生佛。攝四菩薩。金剛寶。金剛光。金剛幢。金剛笑。四菩薩也。西方阿彌陀佛。攝四菩薩。金剛法。金剛利。金剛因。金剛語。爲四菩薩也。北方不空成就佛。攝四菩薩。金剛業。金剛護。金剛牙。金剛拳。爲四菩薩也。四方佛各四菩薩。爲十六大菩薩也。

於三十七尊中。除五佛四波羅密。及後四攝八供養。但取十六大菩薩爲四方佛所攝也。又摩阿般若經中。內空至無性自性空。亦有十六義。一切有情。于心質中。有一分淨性。衆行皆備。其體極微妙。皎然明白。乃至輪迴六趣。亦不變易。如月十六分之一。凡月。其一分明相若。當合宿之際。但爲日光奪其明性。所以不現。後起月初。日日漸加。至十五日。圓滿無礙。所以觀行者。初以阿字發起本心之中。分明。只漸令潔白分明。證無生智。夫阿字者。一切諸法本不生義。

准毗盧遮那經疏。釋阿字。具有五義。一者阿字短聲。是菩提心。二阿字引聲。是菩提行義。三暗字短聲。是證菩提義。四惡字短聲。是般涅槃義。五惡字引聲。是具足方便智義。又將阿字配解法華經中開示悟入四字也。開

字者。開佛知見。即雙開菩提心。如初阿字是菩提心義也。示字者。示佛知見。如第二阿字是菩提行義也。悟字者。悟佛知見。如第三暗字是證菩提義也。入字者。入佛知見。如第四惡字是般涅槃義也。總而言之。具足成就第五惡字是方便善巧智圓滿義也。即讚阿字是菩提心義。頌曰。

入葉白蓮一肘間。炳現阿字素光色。

禪智俱入金剛縛。召入如來寂靜智。

扶會阿字者。楷實決定觀之。當觀圓明淨識。若纔見者。則名見真勝義諦。若常見者。則入菩薩初地。若轉漸增長。則廓周法界。量等虛空。卷舒自在。當具一切智。凡修習瑜伽觀行人。當須具修三密行。證悟五相成身義也。

所言三密者。一身密者。如結契印。召請聖衆是也。二語密者。如密誦真言。
令文句了了分明無謬誤也。三意密者。如住瑜伽相應白淨月圓滿滿觀菩
提心也。次明五相成身者。一是通達心。二是菩提心。三是金剛心。四是金
剛身。五是證無上菩提。獲金剛堅固身也。然此五相具備。方成本尊身也。
其圓明。則普賢身也。亦是普賢心也。與十方諸佛同之。亦乃三世修行。證
有前後。及達悟已。無去來今。凡人心如合蓮華。佛心如滿月。此觀若成。十
方國土若淨若穢。六道含三乘行位。及三世國土成壞。衆生業差別。菩
薩因地行相。三世諸佛。悉於中現。證本尊身。滿足普賢一切行願。故大毘
盧遮那經云。如是真實心故。佛所宣說。問前言二乘之人。有法執故。不得
成佛。今復令修菩提心三摩地者。云何差別。答二乘之人。有法執故。久久

證理。沈空滯寂。限以劫數。然發大心。又乘散善門中。經無數劫。是故足可厭離。不可依止。今真言行人。既破人法上執。雖能正見真實之智。或爲無始間隔。未能證於如來一切智智。故欲求妙道。修持次第。從凡入佛位者。即此三摩地者。能達諸佛自性。悟諸佛法身。證法界體性智。成大毘盧遮那佛自性身。受用身。變化身。等流身。爲行人未證故。理宜修之。故大毘盧遮那經云。悉地從心生。如金剛頂瑜伽經說。一切義成就菩薩。初坐金剛座。取證無上道。遂蒙諸佛授此心地。然能證果。凡今之人。若心決定。如教修行。不起於座。三摩地現前。應於是成就本尊之身。故大毘盧遮那經。供養次第法云。若無勢力廣增益。住法但觀菩提心。佛說此中具萬行。滿足淨白純淨法也。此菩提心能包藏一切諸佛功德法故。若修證出現。則爲

一切導師。若歸本。則是密嚴國土。不起于座。能成一切佛事。讚菩提心曰。

若人求佛慧。通達菩提心。父母所生身。速證大覺位。

勸發菩提心論終

善惡之報 如影隨形

三世因果 循環不停

此生空過 靈性沈淪

盼望同志 及早修行

周安士居士曰佛之五戒彷彿儒之五常但當交相讚不當交相毀世俗不察聞慈悲之說出於佛氏必反乎其說而吾儒之仁於斯而喪聞盜淫之戒出於佛氏必反乎其戒而吾儒之義於是而亡聞妄言之禁出於佛氏必反乎其禁而吾儒之忠信於此而滅豈非衛道而反害道耶昔有學者以佛教之害問象山先生曰試問害在何處今之害道者正在此種閒

言語

勸發菩提心論

天親菩薩造

姚秦三藏法師鳩摩羅什譯

古閩翁氏醒迷子守謙校

勸發品第一

敬禮無邊際 去來現在佛 等空不動智 救世大悲尊

有大方等最上妙法。摩得勒伽藏菩薩摩訶薩之所修行。所謂勸樂修集。無上菩提。能令衆生發深廣心。建立誓願。畢定莊嚴。捨身命財。攝伏貪慳。修五聚戒。化導犯禁。行畢竟忍。辱調伏。瞋癡發勇。精進安止。衆生集諸禪。

定。爲知衆心。修行智慧。滅除無明。入如實法門。離諸執著。宣示甚深空無相行。稱讚功德。使佛種不斷。有如是等無量方便。助菩提法。清淨之門。當爲一切上上善欲。分別顯示。悉令究竟。阿耨多羅三藐三菩提。諸佛子。若佛弟子。受持佛語。能爲衆生演說法者。應先稱揚佛之功德。衆生聞已。乃能發心。求佛智慧。以發心故。佛種不斷。若比_二比_二尼優婆塞優婆夷。念佛念法。又念如來。行菩薩道時。爲求法故。阿僧祇劫。受諸勤苦。以如是念。爲菩薩說法。乃至一偈。菩薩得聞是法。示教利喜。當種善根。修習佛法。得阿耨多羅三藐三菩提。爲斷無量衆生。無始生死。諸苦惱故。菩薩摩訶薩。欲成無量身心。勤修精進。深發大願。行大方便。起大慈悲。求大智慧。無見頂相。求如是等諸佛大法。當知是法無量無邊。法無量故。福德果報。亦復無

量。如來說言如諸菩薩最初發心下劣一念福德果報。百千萬劫說不能盡。況復一日一月一歲乃至百歲。所習諸心福德果報。豈可說盡。何以故。菩薩所行無盡。欲令一切衆生皆住無生法忍。得阿耨多羅三藐三菩提。故諸佛子。菩薩初始發菩提心。譬如大海初漸起時。當知皆爲下中上價。乃至無價。如意寶珠。作所住處。此寶皆從大海生故。菩薩發心。亦復如是。初漸起時。當知便爲人天聲聞緣覺菩薩諸佛。一切善法禪定智慧之所生處。復次又如三千大千世界。初漸起時。當知便爲二十五有。其中所有一切衆生。悉皆荷負作依止處。菩薩發菩提心亦復如是。初漸起時。普爲一切無量衆生。所謂六趣四生。正見邪見。修善習惡。護持淨戒。犯四重禁。尊奉三寶。謗毀正法。諸魔外道。沙門梵志。刹利婆羅門。毘舍首陀。一切荷

負作依止處。復次菩薩發心。慈悲爲首。菩薩大慈。無量無邊。是故發心。無有齊限等衆生界。譬如虛空。無不普覆。菩薩發心。亦復如是。一切衆生。無不覆者。如衆生界。無量無邊。不可窮盡。菩薩發心。亦復如是。無量無邊。無有窮盡。虛空無盡。故衆生無盡。衆生無盡。故菩薩發心等衆生界。衆生界者。無有齊限。我今當承聖旨。說其少分。東方盡千億恆河沙阿僧祇諸佛世界。南西北方。四維上下。各千億恆河沙阿僧祇諸佛世界。盡末爲微塵。此諸微塵。皆不與肉眼作對。百萬億恆河沙阿僧祇三千大千世界所有衆生。悉共聚集。共取一塵。二百萬億恆河沙阿僧祇三千大千世界所有衆生。共取二塵。如是展轉。取十方各千億恆河沙阿僧祇諸佛世界。所有地種。微塵都盡。是衆生界。猶不可盡。譬如有人。折破一毛。以爲百分。以一

分毛滴大海水。我今所說衆生少分亦復如是。其不說者如大海水。假使諸佛於無量無邊阿僧祇劫。廣演譬喻說亦不盡。菩薩發心悉能遍覆如是衆生。云何諸佛子是。菩提心豈可盡也。若有菩薩聞如是說。不驚不怖不退不沒。當知是人決定能發菩薩之心。假令無量一切諸佛於無量阿僧祇劫。讚其功德亦不可盡。何以故。是菩提心無有齊限不可盡故。有如是等無量利益。是故宣說爲令衆生普使得聞發菩提心。

發心品第二

菩薩云何發菩提心。以何因緣修集菩提。若菩薩親近善知識供養諸佛。修集善根志求正法。心常柔和遭苦能忍。慈悲淳厚深心平等。信樂大乘求佛智慧。若人能具如是十法。乃能發阿耨多羅三藐三菩提心。復有四

緣。發心修習無上菩提。何謂爲四。一者思惟諸佛發菩提心。二者觀身過患發菩提心。三者慈悲衆生發菩提心。四者求最勝果發菩提心。思惟諸佛復有五事。一者思惟十方過去未來現在諸佛初始發心具煩惱性亦如我今。終成正覺爲無上尊。以此緣故發菩提心。二者思惟一切三世諸佛發大勇猛。各各能得無上菩提。若此菩提是可得法。我亦應得。緣此事故發菩提心。三者思惟一切三世諸佛發大明慧。於無明_穀建立勝心。積集苦行。皆能自拔超出三界。我亦如是當自拔濟。緣此事故發菩提心。四者思惟一切三世諸佛爲人中雄。皆度生死煩惱大海。我亦丈夫亦當能度。緣此事故發菩提心。五者思惟一切三世諸佛發大精進捨身命財求一切智。我今亦當隨學諸佛。緣此事故發菩提心。觀身過患發菩提心。復

有五事。一者自觀我身。五陰四大俱能興造無量惡業。欲捨離故。二者自觀我身。九孔常流臭穢不淨。生厭離故。三者自觀我身。有貪瞋癡無量煩惱。燒然善心。欲除滅故。四者自觀我身。如泡如沫。念念生滅。是可捨法。欲棄捐故。五者自觀我身。無明所覆。常造惡業。輪迴六趣。無利益故。求最勝果。發菩提心。復有五事。一者見諸如來。相好莊嚴。光明清徹。遇者除惱。爲修習故。二者見諸如來。法身常住。清淨無染。爲修習故。三者見諸如來。有戒定慧。解脫解脫。知見清淨法聚。爲修習故。四者見諸如來。有十力四無所畏。大悲三念處。爲修習故。五者見諸如來。有一切智。憐愍衆生。慈悲普覆。能爲一切愚迷正道。爲修習故。慈愍衆生。發菩提心。復有五事。一者見諸衆生。爲無明所縛。二者見諸衆生。爲衆苦所纏。三者見諸衆生。集不善

業。四者見諸衆生造極重惡。五者見諸衆生不修正法。無明所縛復有四事。一者見諸衆生爲癡愛所感受大劇苦。二者見諸衆生不信因果造作惡業。三者見諸衆生捨離正法信受邪道。四者見諸衆生沒煩惱河四流所漂。衆苦所纏復有四事。一者見諸衆生畏生老病死不求解脫而復造業。二者見諸衆生憂悲苦惱而常造作無有休息。三者見諸衆生愛別離苦而不覺悟方便染著。四者見諸衆生怨憎會苦常起嫌疑更復造怨。集不善業復有四事。一者見諸衆生爲愛欲故造作諸惡。二者見諸衆生知欲生苦而不捨欲。三者見諸衆生雖欲求樂不具戒足。四者見諸衆生雖不樂苦造苦不息。造極重惡復有四事。一者見諸衆生毀犯重戒雖復憂懼而猶放逸。二者見諸衆生興造極惡五無間業。凶頑自蔽不生慚愧。三

者見諸衆生謗毀大乘方等正法。專愚自執。方起驕慢。四者見諸衆生雖懷聰哲。而具斷善根。反自貢高。永無改悔。不修正法。復有四事。一者見諸衆生生於八難。不聞正法。不知修善。二者見諸衆生值佛出世。聞說正法。不能受持。三者見諸衆生染習外道。苦身修業。永離出要。四者見諸衆生修得非想。非非想定。謂是涅槃。善報既盡。還墮三塗。菩薩見諸衆生無明造業。長夜受苦。捨離正法。迷於出路。爲是等故。發大慈悲。志求阿耨多羅三藐三菩提。如救頭然。一切衆生有苦惱者。我當拔濟。令無有餘。諸佛子。我今略說初行菩薩緣事。發心若廣說者。無量無邊。

願誓品第三

菩薩云。何發趣菩提。以何業行成就菩提。發心菩薩住乾慧地。先當堅固。

發於正願。攝受一切無量衆生。我求無上菩提。救護度脫。令無有餘。皆令究竟無餘涅槃。是故初始發心。大悲爲首。以悲心故。能發轉勝十大正願。何謂爲十。一者願我先世及以今身所種善根。以此善根。施與一切無邊衆生。悉共迴向無上菩提。令我此願念念增長。世世所生常繫在心。終不忘失。爲陀羅尼之所守護。二者願我迴向大菩提已。以此善根。於一切生處。常得供養一切諸佛。不生無佛國土。三者願我得生諸佛國已。常得親近隨侍左右。如影隨形。無刹那頃遠離諸佛。四者願我得親近佛已。隨我所應。爲我說法。即得成就菩薩五通。五者願我成就菩薩五通已。即通達世諦假名流布。解了第一義諦。如真實性。得正法智。六者願我得正法智已。以無厭心。爲衆生說。示教利喜。皆令開解。七者願我能開解諸衆生已。

以佛神力遍至十方無餘世界。供養諸佛聽受正法廣攝衆生。八者願我於諸佛所受正法已。即能隨轉清淨法輪。十方世界一切衆生聽我法者聞我名者。即得捨離一切煩惱發菩提心。九者願我能令一切衆生發菩提心已。常隨將護除無利益與無量樂。捨身命財攝受衆生荷負正法。十者願我能荷負正法已。雖行正法心無所行。如諸菩薩行於正法。而無所行亦無不行。爲化衆生不捨正願。是名發心菩薩十大正願。此十大願遍衆生界。攝受一切恒沙諸願。若衆生界盡我願乃盡。而衆生界實不可盡。我此大願亦無有盡。復次布施是菩提因。攝取一切諸衆生故。持戒是菩提因。具足衆善滿本願故。忍辱是菩提因。成就三十二相八十隨形好故。精進是菩提因。增長善行於諸衆生勤教化故。禪定是菩提因。自己調伏。

能知衆生諸心行故。智慧是菩提因。具足能知諸法性相故。取要言之。六波羅蜜是菩提正因。四無量心三十七品諸萬善行共相助成。若曇薩修習六波羅蜜。隨其所行。漸漸得近阿耨多羅三藐三菩提。諸佛子。求菩提者不應放逸。放逸之行能壞善根。若菩薩制伏六根不放逸者。是人能修六波羅蜜。菩薩發心先建至誠立決定誓。立誓之人終不放逸懈怠慢緩。何以故。立決定誓。有五事持故。一者能堅固其心。二者能制伏煩惱。三者能遮放逸。四者能破五蓋。五者能勤修行六波羅蜜。如佛所讚。

如來大智尊 顯說功德證 忍慧福業力 誓願力最勝

云何立誓。若有人來種種求索。我於爾時隨有施與。乃至不生一念慳吝之心。若生惡心如彈指頃。以施因緣求淨報者。我即欺誑十方世界無量

無邊阿僧祇現在諸佛。於未來世亦當必定不成阿耨多羅三藐三菩提。若我持戒。乃至失命。建立淨心誓無改悔。若我修忍。爲他侵害乃至割截。常生慈愛誓無恚礙。若我修精進。遭逢寒暑王賊水火^劫。虎狼無水穀處。要必堅強其心誓不退沒。若我修禪。爲外事所撓不得攝心。要必繫念在境。誓不暫起非法亂想。若我修習智慧。觀一切法如實性。隨順受持。於善不善有爲無爲生死涅槃。不起二見。若我心悔恚礙退沒亂想。起於二見如彈指頃。而以戒忍精進禪智求淨報者。我即欺誑十方世界無量無邊阿僧祇現在諸佛。於未來世亦當必定不成阿耨多羅三藐三菩提。菩薩以十大願持正法行。以六大誓制放逸心。必能精勤修習六波羅蜜。成阿耨多羅三藐三菩提。

檀那波羅羅蜜品第四

云何菩薩修行布施。布施若爲自利利他。及二俱利。如是布施。則能莊嚴菩提之道。菩薩爲欲調伏衆生。令離苦惱。是故行施。修行施者。於己財物。常生捨心。於來求者。起尊重心。如父母師長。善知識。想於貧窮下賤。起憐愍心。如一子想。隨所須_需。與心喜恭敬。是名菩薩初修施心。修布施故。善名流布。隨所生處。財寶豐盈。是名自利。能令衆生心得滿足。教化調伏。使無慳吝。是名利他。以己所修。無相大施。化諸衆生。令同己利。是各俱利。因修布施。獲得轉輪王位。攝受一切無量衆生。乃至得佛無盡法藏。是名莊嚴菩提之道。施有三種。一以法施。二無畏施。三財物施。以法施者。勸人受戒。修出家心。爲壞邪見。說斷常四倒。衆惡過患。分別開示真諦之義。讚精進功。

德。說放逸過惡。是名法施。若有衆生怖畏王者。師子虎狼水火盜賊。菩薩見己能爲救護。名無畏施。自於財物施而不吝。上至珍寶象馬車乘繒帛穀麥衣服飲食。下至麩團一縷之線。若多若少。稱求者意。隨所須與。是名財施。財施有五種。一者至心施。二者信心施。三者隨時施。四者自手施。五者如法施。所不應施。復有五事。非理求財。不以施人。物不淨故。酒及毒藥。不以施人。亂衆生故。賁羅機網。不以施人。惱衆生故。刀仗弓箭。不以施人。害衆生故。音樂女色。不以施人。壞淨心故。取要言之。不如法物。惱亂衆生。不以施人。自餘一切。能令衆生得安樂者。名如法施。樂施之人。復獲五種名聞善利。一者常得親近一切賢聖。二者一切衆生之所樂見。三者人大衆時人所宗敬。四者好名善譽。流聞十方。五者能爲菩提作上妙因。菩薩

之人名一切施。一切施者非謂多財。謂施心也。如法求財持以布施。名一切施。以清淨心無諂曲施。名一切施。見貧窮者憐愍心施。名一切施。見厄苦者慈悲心施。名一切施。居貧少財而能用施。名一切施。愛重寶物開意能施。名一切施。不觀持戒毀戒田非田施。名一切施。不求人天妙善樂施。名一切施。志求無上大菩提施。名一切施。欲施施時歡喜施已不悔。名一切施。若以華施。具足陀羅尼七覺華故。若以香施。具戒定慧熏塗身故。若以果施。具足成就無漏果故。若以食施。具足命辯色力樂故。以衣服施。具清淨色除無慚愧故。以燈明施。具足佛眼照了一切諸法性故。以象馬車乘施。得無上乘。具足神通故。以瓔珞施。具足八十隨形好故。以珍寶施。具足大人三十二相故。以筋力僕使施。具佛十力四無畏故。取要言之。乃至

國城妻子頭目手足。舉身施與。心無吝惜。爲得無上菩提度衆生故。菩薩摩訶薩修行布施。不見財物施者。受者以無相故。是則具足檀那波羅蜜。尸羅波羅蜜品第五。

云何菩薩修行持戒。持戒若爲自利他利及二俱利。如是持戒。則能莊嚴菩提之道。菩薩爲欲調伏衆生。令離善惱。是故持戒修持戒者。悉淨一切身口意業。於不善行。心能捨遠。善能訶責。惡行毀禁。於小罪中心常恐怖。是名菩薩初持戒心。修持戒故。遠離一切諸惡過患。常生善處。是名自利。教化衆生。令不犯惡。是名利他。以已所修。向菩提戒。化諸衆生。令同己利。是名俱利。因修持戒。獲得離欲。乃至盡漏。成最正覺。是名莊嚴菩提之道。戒有三種。一者身。二者口。三者心。持身戒者。永離一切殺盜婬行。不奪物。

命不侵他財。不犯外色。又亦不爲殺等因緣及其方便。不以杖木瓦石傷害衆生。若物屬他。他所受用。一草一葉不與不取。又亦未嘗眄睞細色。於四威儀恭謹詳審。是名身戒。持口戒者。斷除一切妄語兩舌惡口綺語。常不欺誑離間和合。誹謗毀訾。文飾言辭。及造方便惱觸於人。言則至誠柔軟。忠信。言常饒益。勸化修善。是名口戒。持心戒者。除滅貪欲瞋恚邪見。常修輒心。不作過罪。信是罪業得惡果報。思惟力故。不造諸惡。於輕罪中生極重想。設誤作者。恐怖憂悔。於衆生所不起瞋惱。見衆生已生愛念心。知恩報恩。心無慳恚。樂作福德。常以化人。常修慈心。憐愍一切。是名心戒。是十善業戒。有五事利益。一者能制惡行。二者能作善心。三者能遮煩惱。四者成就淨心。五者能增長戒。若人善修不放逸行。具足正念。分別善惡。當

知是人決定能修十善業戒。八萬四千無量戒品。悉皆攝在十善戒中。是十善戒能爲一切善戒根本。斷身口意惡。能制一切不善之法。故名爲戒。戒有五種。一者波羅提木叉戒。二者定共戒。三者無漏戒。四者攝根戒。五者無作戒。白四羯磨從師而受。名波提羅木叉戒。根本四禪四未到禪。是名定共戒。根本四禪初禪未到。名無漏戒。守攝諸根。修正念心。見聞覺知色聲香味觸不生放逸。名攝根戒。捨身後世更不作惡。名無作戒。菩薩修戒不與聲聞辟支佛共。以不共故名善持戒。善持戒故則能利益一切衆生。持慈心戒。教護衆生令安樂故。持悲心戒。忍受諸苦拔厄難故。持喜心戒。勸樂修善不懈怠故。持捨心戒。怨親平等離愛恚故。持惠施戒。教化調伏諸衆生故。持忍辱戒。心常柔軟無恚癡故。持精進戒。善業日增不退還。

故。持禪定戒。離欲不善長禪枝故。持智慧戒。多聞善根無厭足故。持親近善知識戒。助成菩提無上道故。持遠離惡知識戒。捨離三惡八難處故。菩薩之人持淨戒者。不依欲界不近色界不住無色界是清淨戒。捨離欲塵除瞋恚癡滅無明障是清淨戒。離斷常二邊不逆因緣是清淨戒。不著色受想行識假名之相是清淨戒。不繫於因不起諸見不住疑悔是清淨戒。不住貪癡瞋三不善根是清淨戒。不住我慢憍慢增上慢慢大慢。柔和善順是清淨戒。利衰毀譽稱譏苦樂不以傾動是清淨戒。不染世諦虛妄假名。順於真諦是清淨戒。不惱不熱寂滅離相是清淨戒。取要言之。乃至不惜身命觀無常想生於厭離。勤行善根勇猛精進是清淨戒。菩薩摩訶薩修行持戒不見淨心。以離相故。是則具足尸羅波羅蜜。

毘提波羅蜜品第六

云何菩薩行修忍辱。忍辱若爲自利他利及二俱利。如是忍辱則能莊嚴
菩提之道。菩薩爲欲調伏衆生令離苦惱故修忍辱。修忍辱者心常謙下
一切衆生。剛強驕慢捨而不行。見麤惡者起憐愍心。言常柔軟勸化修善。
能分別說瞋恚和忍。果報差別。是名菩薩初忍辱心。修忍辱故遠離衆惡
身心安樂。是名自利。化導衆生皆令和順。是名利他。以己所修無上忍辱
化諸衆生令同己利。是名俱利。因修忍辱獲得端正。人所宗敬。乃至得佛
上妙相好。是名莊嚴菩提之道。忍辱有三。謂身口意。云何身忍。若他加惡
侵毀搥打。乃至傷害悉能忍受。見諸衆生威逼恐懼。以身代之而無疲怠。
是名身忍。云何口忍。若見罵者默受不報。若有非理來訶責者。當輒語附

順。若有加誣橫生誹謗。皆當忍受。是名口忍。云何意忍。見有瞋者。心不懷恨。若有觸惱。其心不亂。若有譏毀。心亦無怨。是名意忍。世間打者。有二種。一者實。二者橫。若有過惡。若人嫌疑。爲彼所打。自應忍受。如服甘露。於彼人所應生恭敬。所以者何。善能教誡。調伏於我。令我得離諸過罪故。若橫加惡傷害於我。當自思惟。我今無罪。當是過去宿業所招。是亦應忍。復應思念。四大假合。五衆緣會。誰受打者。又觀前人。如癡如狂。我當愍之。云何不忍。又罵者。亦有二種。一實。二虛。若說實者。我應生慚。若說虛者。無預我事。猶如響聲。亦如風過。無損於我。是故應忍。又瞋者。亦爾。他來瞋我。我當忍受。若瞋彼者。於未來世。當墮惡道。受大苦惱。以是因緣。我身若被斫截。分離。不應生瞋。應當深觀往業。因緣。當修慈悲。憐愍一切。如是小苦。不能

忍者。我即不能自調伏心。云何當能調伏衆生。令得解脫一切惡法。成無上果。若有智人樂修忍辱。是人當得顏貌端正。多饒財寶。人見歡喜敬仰。伏從。復當觀察。若人形殘顏色醜惡。諸根不具。乏於財物。當知皆是瞋因緣得。以是因緣。智者應當深修忍辱。生忍因緣有十事。一者不觀於我。及我所相。二者不念種姓。三者破除驕慢。四者惡來不報。五者觀無常相。六者修於慈悲。七者心不放逸。八者捨於飢渴苦樂等事。九者斷除瞋恚。十者修習智慧。若人能成如是十事。當知是人能修於忍。菩薩摩訶薩修於清淨畢竟忍時。若人空無相無願無作。不與見覺願作和合。不倚著空無相無願無作。是諸見覺願作皆空。如是忍者是無二相。是名清淨畢竟忍也。若人盡結若入寂滅。不與盡結生死和合。不倚盡結寂滅諸結生死皆

空。如是忍者是無二相。是名清淨畢竟忍也。若性不自生。不從他生。不和合生。亦無有出不可破壞。不可壞者是不可盡。如是忍者是無二相。是名清淨畢竟忍也。無作非作無所倚著。無分別無莊嚴。無修治無發進。終不造生。如是忍者是無生忍。如是菩薩修行是忍時。得受記忍。菩薩摩訶薩。修行忍辱性相盡空。無衆生改。是則具足屢提波羅密。

毘梨耶波羅蜜品第七

云何菩薩修行精進。精進若爲自利他利及三俱利。如是精進。則能莊嚴菩提之道。菩薩爲欲調伏衆生。令離苦惱。故修精進。修精進者。於一切時常勤修習清淨梵行。捨離怠慢心。不放逸。於諸艱難不饒益事。心常精勤。終不退沒。是名菩薩初精進心。修精進故。能得世閒出世閒上妙善法。是

名自利。教化衆生令勤修善。是名利他。以己所修菩提正因。化諸衆生令同己利。是名俱利。因修精進。獲得轉勝清淨妙果。超越諸地。乃至速成正覺。是名莊嚴菩提之道。精進有二種。一者爲求無上道故。二者廣欲拔濟衆苦而起精進。菩薩成就十念。乃能發心勤行精進。云何十念。一者念佛無量功德。二者念法不思議解脫。三者念僧清淨無染。四者念行大慈安立衆生。五者念行大悲拔濟衆苦。六者念正定聚勸樂修善。七者念邪定聚拔令反本。八者念諸餓鬼飢渴熱惱。九者念諸畜生長受衆苦。十者念諸地獄備受燒煮。菩薩如是思惟十念。三寶功德我當修習。慈悲正定我當勸勵。邪定衆生三惡道苦我當拔濟。如是思惟專念不亂。日夜勤修無有休廢。是名能起正念精進。菩薩精進復有四事。所謂修行四正勤道。未

生惡法遮令不生。已生惡法速令除斷。未生善法方便令生。已生善法修滿增廣。菩薩如是修四正勤道而無休息。是名精進。是勤精進能壞一切諸煩惱界。增長無上菩提正因。菩薩若能受於一切身心大苦。爲欲安立諸衆生故而不疲倦。是名精進。菩薩遠離惡時諛曲邪精進。已修正精進。所謂修信施戒忍定慧慈悲喜捨。欲作已作當作。至心常行精勤無悔。於諸善法及拔濟衆苦。如救頭然心不退沒。是名精進。菩薩雖復不惜身命。然爲拔濟衆苦救護正法。當應愛惜。不捨威儀常修善法。修善法時心無懈怠。失身命時不捨如法。是名菩薩修菩提道勤行精進。懈怠之人不能一時一切布施。不能持戒忍於衆苦勤行精進攝心念定分別善惡。是故說言六波羅蜜。因於精進而得增長。若菩薩摩訶薩精進增上。則能疾得

阿耨多羅三藐三菩提。菩薩發大莊嚴而起精進。復有四事。一者發大莊嚴。二者積集勇健。三者修諸善根。四者教化衆生。云何菩薩發大莊嚴。於諸生死心能堪忍。不計劫數。於無量無邊百千萬億那由他恆河沙阿僧祇劫。當成佛道心不疲倦。是名不懈莊嚴精進。菩薩積集勇健而趣精進。若三千大千世界滿中盛火。爲見佛故爲聞法故。爲安止衆生於善法故。要當從是火中而過。爲調伏衆生。心善安止於大悲中。是名勇健精進。菩薩修習善根而起精進。如所發起一切善根。悉以迴向阿耨多羅三藐三菩提。爲欲成就一切智故。是名修習善根精進。菩薩教化衆生而起精進。衆生之性不可稱計。無量無邊同虛空界。菩薩立誓我當度之。無有遺餘。爲欲化度勤行精進。是名教化精進。取要言之。菩薩修助道功德助無上。

智慧。修習佛法而起精進。佛諸功德無量無邊。菩薩摩訶薩。發大莊嚴。所行精進。亦復如是無量無邊。菩薩摩訶薩。修行精進。無離欲心。拔衆苦故。是則具足毘梨耶波羅蜜。

禪波羅蜜品第八

云何菩薩修習禪定。禪定若爲自利他利及二俱利。如是禪定。則能莊嚴菩提之道。菩薩爲欲調伏衆生。令離苦惱。故修禪定。修禪定者。善攝其心。一切亂想。不令妄干。行住坐臥。係念在前。逆順觀察。髑髏項脊。臂肘胸脇。臆脛脛腺。安般數息。是名菩薩初修定心。修禪定故。不受衆惡心。常悅樂。是名自利。教化衆生。令修正念。是名利他。以已所修清淨三昧。離惡覺觀。化諸衆生。令同已利。是名俱利。因修禪定。獲得八解。乃至首楞嚴金剛三

味是名莊嚴菩提之道。禪定由三法生。云何爲三。一從聞慧。二從思慧。三從修慧。從是三法漸漸而生一切三昧。云何聞慧。如所聞法心常愛樂。復作是念。無礙解脫等諸佛法。要因多聞而得成就。作是念已。於一切求法時轉加精勤。日夜常樂聽法。無有厭足。是名聞慧。云何思慧。思念觀察一切有爲法如實相。所謂無常苦空無我不淨。念念生滅不久敗壞。而諸衆生憂悲苦惱憎愛所繫。但爲貪患癡火所然。增長後世苦惱大聚。無有實性。猶如幻化。見如是已。於一切有爲法即生厭離。轉加精勤趣佛智慧。思惟如來智慧不可思議不可稱量。有大勢力無能勝者。能至無畏安隱大城不復轉還。能救無量苦惱衆生。如是知見佛無量智。見有爲法無量苦惱。志願進求無上大乘。是名思慧。云何修慧。從初覺觀乃至阿耨多羅三

藐三菩提。皆名修慧。離欲不善法。有覺有觀。離生喜樂入初禪。滅覺觀內清淨心二處。無覺無觀。定生喜樂入三禪。離喜故行捨心。念安慧身受樂。諸賢聖能說能捨。常念受樂入三禪。斷苦斷樂故。先滅憂喜故。不苦不樂行。舍念淨入四禪。過一切色相。滅一切有對相。不念一切別異相故。知無邊虛空即入虛空無色定處。過一切虛空相。知無有識。即入無色識定處。過一切識相。知無所有。即入無所有無色定處。過一切無所有處。知非有想非無想。安隱即入無色非有想非無想處。但隨順諸法行故而不樂著。求無上乘成最正覺。是名修慧。菩薩從是聞思修慧。精勤攝心。則能成就通明三昧禪波羅密。復次菩薩修定。復有十法行。不與聲聞辟支佛共何等。十一者修定無有吾我。具足如來諸禪定故。二者修定不味不著。捨離染

心不求已樂故。三者修定具諸通業。爲知衆生諸心行故。四者修定爲知衆心。度脫一切諸衆生故。五者修定行於大悲。斷諸衆生煩惱結故。六者修定諸禪三昧。善知入出過於三界故。七者修定常得自在。具足一切諸善法故。八者修定其心寂滅。勝於二乘諸禪三昧故。九者修定常入智慧。過諸世間到彼岸故。十者修定能興正法。紹隆三寶。使不斷絕故。如是定者。不與聲聞辟支佛共。復次爲知一切衆生煩惱心故。是故修習諸禪定。法助成住心。令此禪定住平等心。是名爲定。如是等定。則等於空無相無願無作。空無相無願無作等者。則衆生等。衆生等者。則諸法等。入如是等。是名爲定。復次菩薩雖隨世行。不襍於世。捨世八法。滅一切結。遠離憒鬧。樂於獨處。菩薩如是修行禪定。心安止住。離世所作。復次菩薩修定。具諸

通智方便慧故。云何爲通。云何爲智。若見色相。若聞音聲。若知他心。若念過去。若能遍至諸佛世界。是名爲通。若知色即法性。解了音聲心行。性相寂滅。三世平等。知諸佛界同虛空相。而不證滅盡。是名爲智。云何方便。云何爲慧。入禪定時。生大慈悲。不捨誓願。心如金剛。觀諸佛世界。莊嚴菩提道場。是名方便。其心永寂。無我無衆生。思惟諸法本性不亂。見諸佛界同於虛空。觀所莊嚴。同於寂滅。是名爲慧。是名菩薩修行禪定通智方便。智慧差別。四事俱行。得近阿耨多羅三藐三菩提。菩薩摩訶薩修行禪定。無餘惡心。以不動法故。是則具足禪那波羅蜜。

般若波羅蜜品第九

云何菩薩修習智慧。智慧若爲自利他利及二俱利。如是智慧。則能莊嚴

菩提之道。菩薩爲欲調伏衆生。令離苦惱。故修智慧。修智慧者。悉學一切世間之事。捨貪瞋癡。建立慈心。憐愍饒益一切衆生。常念拔濟。爲作將導。能分別說邪道正道及善惡報。是名菩薩初智慧心。修智慧故。遠離無明。除煩惱障及智慧障。是名自利。教化衆生。今得調伏。是名利他。以已所修。無上菩提。化諸衆生。令同已利。是名俱利。因修智慧。獲得初地。乃至薩婆若智。是名莊嚴菩提之道。菩薩修行智慧。有二十心。能漸建立。何謂二十。當發善欲。親近善友心。捨離驕慢。不放逸心。隨順教誨。樂聽法心。聞法無厭善思惟心。行四梵行。修正智心。觀不淨行。生厭離心。觀四眞諦。十六聖心。觀十二因緣。修明慧心。聞諸波羅蜜。念欲修習心。觀無常苦無我寂滅心。觀空無相無願無作心。觀陰界人多過患心。降伏煩惱。非伴侶心。護諸

善法自伴侶心。抑制惡法令除斷心。修習正法令增廣心。雖修二乘常捨離心。聞菩薩藏樂奉行心。自利利他隨順增進諸善業心。持真實行求一切佛法心。復次菩薩修行智慧。復有十法善思惟心。不與聲聞辟支佛共。何謂爲十。思惟分別定慧根本。思惟不捨斷常二邊。思惟因緣生起諸法。思惟無衆生我人壽命。思惟無三世去來住法。思惟無發行而不斷因果。思惟法空而植善不懈。思惟無相而度衆生不廢。思惟無願而求菩提不離。思惟無作而現受身不捨。復次菩薩復有十二善入法門。何謂十二。善入空等三昧而不取證。善入諸禪三昧而不隨禪生。善入諸通智而不證無漏法。善入內觀法而不證決定。善入觀一切衆生空寂而不捨大慈善入觀一切衆生無我而不捨大悲。善入生諸惡趣而非業故生。善入離欲

而不證離欲法。善入捨所欲樂而不捨法樂。善入捨一切戲論諸覺而不捨方便諸觀。善入思量有爲法多過患而不捨有爲。善人無爲法清淨遠離而不住無爲。菩薩能修一切善入法門。即能善解三世空無所有。若作是觀。觀三世空智慧力故。若於三世諸佛所種無量功德。悉以廻向無上菩提。是名菩薩善觀三世方便。復次雖見過去盡法不至未來。而常修善根精勤不懈。觀未來法雖無生出。不捨精進願向菩提。觀現在法雖念念滅。其心不忘發趣菩提。是名菩薩觀三世方便。過去已滅未來未至現在不住。雖如是觀心心數法生滅散壞。而常不捨聚集善根助菩提法。是名菩薩觀三世方便。復次菩薩觀一切善不善我無我。實不實空不空。世諦眞諦正定邪定。有爲無爲有漏無漏。黑法白法生死涅槃。如法界性一相。

無相此中無法可名無相。亦無有法以爲無相。是則名爲一切法印不可壞印。於是印中亦無印相。是名眞實智慧方便般若波羅蜜。發菩提心菩薩摩訶薩。應如是學。應如是行。如是行者即近阿耨多羅三藐三菩提。菩薩摩訶薩修行智慧心無所行。法性淨故。是則具足般若波羅蜜。

如實法門品第十

若善男子善女人。修習六波羅蜜。求阿耨多羅三藐三菩提者。應離七法。何等爲七。一者離惡知識。惡知識者。所謂教人捨離上信上欲上精進集衆雜行。二者離於女色。貪著嗜欲。狎習世人而與執事。三者離於惡覺。自觀形容貪惜愛重。染著守護謂可久保。四者離於瞋恚暴慢嫉忌。興起諍訟壞亂善心。五者離於放逸憍慢懈怠。自恃小善輕蔑於人。六者離於外

道書論及世俗文頌綺飾言辭。非佛所說不應讚誦。七者不應親近邪見。近
惡見。如是七法所應遠離。如來說言不見更有餘法深障佛道。如此七法
是故菩薩應當遠離。若欲疾得無上菩提。當修七法。何謂爲七。一者菩薩
當親近善知識。善知識者。所謂諸佛及諸菩薩。若聲聞人。能令菩薩住深
法藏。諸波羅蜜。亦是菩薩善知識也。二者菩薩應當親近出家。亦當親近
阿蘭若法。離於女色及諸嗜欲。不與世人而共從事。三者菩薩應當自觀。
形如糞土。但盛臭穢。風寒熱血。無可貪著。日當就死。宜思厭離。精勤修道。
四者菩薩應當常行和忍。恭敬柔順。亦勸他人。令住忍中。五者菩薩應當
修習精進。常生慚愧。敬奉師長。憐愍窮下。見危苦者。以身代之。六者菩薩
應當修習方便。大乘諸菩薩藏。佛所讚法。受持讀誦。七者菩薩應當親近。

修習第一義諦。所謂實相一相無相。若諸菩薩欲疾速得無上菩提。應當親近如是七法。復次若人發菩提心。以有所得於無量阿僧祇劫。修習慈悲喜捨布施持戒忍辱。精進禪定智慧。當知是人。不離生死。不向菩提。何以故。有所得心。及諸得見。陰界入見。我見。人見。衆生見。壽命見。慈悲喜捨。施戒忍進定智等見。取要言之。佛法僧見。及涅槃見。如是有所得見。即是執著心。執著者。是名邪見。所以者何。邪見之人。輪轉三界。永離出要。是執著者。亦復如是。永離出要。終不能得阿耨多羅三藐三菩提。若人發菩提心。應當觀察。是心空相。何等是心。云何空相。心名意識。卽是識陰。入意界。心空相者。心無心相。亦無作者。何以故。是心相空。無有作者。無使作者。若無作者。則無作相。若菩薩解了如是法者。於一切法。卽無執著。無執著。

故於諸善惡解無果報。於所習慈了無有我。於所習悲了無衆生。於所習喜了無有命。於所習捨了無有人。雖行布施不見施物。雖行持戒不見淨心。雖行忍辱不見衆生。雖行精進無離欲心。雖行禪定無除惡心。雖行智慧心無所行。於一切緣皆是智慧。而不著智慧。不得智慧。不見智慧。行者如是修行智慧。而無所修亦無不修。爲化衆生現行六度。而內清淨。行者如是善修其心。於一念頃所種善根。福德果報無量無邊。百千萬億阿僧祇劫不可窮盡。自然得近阿耨多羅三藐三菩提。

空無相品第十一

往昔一時佛在迦蘭陀竹林。與諸大衆無量集會。爾時世尊頌宣正法。告諸大衆。如來所說諸法無性空無所有。一切世間所難信解。何以故。色無

縛無解。受想行識無縛無解。色無相離諸相。受想行識無相離諸相。色無念離諸念。受想行識無念離諸念。眼色耳聲鼻香舌味身觸意法亦復如是。無取無捨無垢無淨。無去無來無向無背。無闇無明無癡無慧。非此岸非彼岸非中流。是名無縛。無縛故空。空名無相。無相亦空。是名爲空。空名無念。無念亦空。是名爲空。空中無善無惡。乃至亦無空相。是故名空。菩薩若如是知陰界入性即不取著。是名法忍。菩薩以是忍故。得受記忍。諸佛子。譬如有人仰書虛空。悉寫如來十二部經。經無量劫佛法已滅。求法之人無所見聞。衆生顛倒造惡無邊。復有他方淨智慧人。憐愍衆生廣求佛法。行到於此見空中字。文畫分明即便識之。讀誦受持如所說行。廣演分別利益衆生。此書空者識空字人可思議不。而時宣傳修習受持。引導衆

生令離繫縛。諸佛子。如來說言。過去世時求菩提道。得值三十三億九萬八千諸佛。爾時皆爲轉輪聖王。以一切樂具。供養諸佛及弟子衆。以有所得。故不得受記。於後復值八萬四千億九萬辟支佛。亦以四事盡形供養。過是已後。復值六百二十萬一千二百六十一佛。爾時皆爲轉輪聖王。以一切樂具盡形供養。諸佛滅後起七寶塔供養舍利。後佛出世奉迎勸請。轉正法輪供養如是百千萬億諸佛。是諸如來皆於空法中說諸法相。以有所得。故亦不得受記。如是展轉乃至得值然燈佛興。見佛聞法。即得一切無生法忍。得是忍已。乃得受記。然燈如來於空法中說諸法相。度脫無量百千衆生。而無所說。亦無所度。牟尼世尊興出於世。於空法中說有文字。示教利喜。普得受行。而無所。示亦無受行。當知是法性相盡空。書者亦

空識者亦空。說者亦空。解者亦空。從本來空。未來亦空。現在亦空。而諸菩薩積集萬善方便力故。精勤不懈。功德成滿。得阿耨多羅三藐三菩提。此實甚難。不可思議。於無法中說諸法相。於無得中說有得法。如此之事。諸佛境界。以無量智乃可得解。非是思量所能得知。新發意菩薩誠心敬仰。愛樂菩提。信佛語故。漸能得入。云何爲信。信觀四諦。除諸煩惱。妄見結縛。得阿羅漢。信觀十二因緣。滅除無明。生起諸行。得辟支佛。信修四無量心。六波羅蜜。得阿耨多羅三藐三菩提。是名信忍。衆生於無始生死。妄想執著。不見法性。當先觀察自身五陰假名衆生。是中無我。無有衆生。何以故。若有我者。我應自在。而諸衆生常爲生老病死之所侵害。不得自在。當知無我。無我即無作者。無作者亦無受者。法性清淨如實常住。如是觀察。未

能究竟。是名順忍。菩薩修信順忍已不久當成最上法忍。

功德持品第十二

菩薩具足修無相心。而心未嘗住於作業。是菩薩於諸業相知而故作。爲修善根求菩提故不捨有爲。爲諸衆生修大悲故不住無爲。爲一切佛眞妙智故不捨生死。爲度無邊衆生令無餘故不住涅槃。是名菩薩摩訶薩深心求阿耨多羅三藐三菩提。諸佛子。菩薩成就十法。終不退失無上菩提。何謂爲十。一者菩薩深發無上菩提之心。教化衆生亦令發心。二者常樂見佛以己所珍奉施供養深種善根。三者爲求法故以尊敬心供養法師聽法無厭。四者若見比丘僧壞爲二部。互起諍訟共相過惡。勤求方便令其和合。五者若見國土邪惡增上佛法欲壞。能讀誦說乃至一偈令法

不絕。專心護法。不惜身命。六者見諸衆生。恐畏苦惱。爲作救護。施以無畏。七者發勤修行。求如是等方等大乘甚深經法。諸菩薩藏。八者得是法已。受持讀誦。如所說行。如所說住。九者自住於法。亦能勸導。令多衆生入是法中。十者入法中。已能爲解說。示教利喜。開悟衆生。菩薩成就如是十法。於無上菩提終不退失。菩薩應當如是修行此經。如是經典不可思議。所謂能生一切大慈悲種。是經能開悟引導具縛衆生。令發其心。是經能爲向菩提者而作生因。是經能成一切菩薩無動之行。是經能爲過去未來現在諸佛之所護念。若有善男子善女人。欲勤修習無上菩提。當廣宣流布如是經典。於閻浮提使不斷絕。令無量無邊衆生得聞是經。若有善男子善女人聞是經者。是諸人等悉得猛利不可思議大智慧聚。不可稱量。

福德果報。所以者何。是經能開無量清淨慧眼。能使佛種相續不斷。能救無量苦惱衆生。能照一切無明癡闇。能破四魔及諸魔業。能壞一切外道邪見。能滅一切煩惱大火。能消因緣生起諸行。能斷慳貪破戒瞋恚志懈怠亂意愚癡六極重病。能除業障報障法障煩惱障諸見障無明障智障習障取要言之。此經能令一切惡法消滅無餘。能令一切善法熾然增長。若有善男子善女人。聞是經已。歡喜愛樂生希有心。當知是人以曾供養無量諸佛深種善根。所以者何。此經是三世諸佛之所履行。是故行者得聞是經。當自慶幸獲大善利。若有書寫讀誦此經。當知此人所獲福報無量無邊。所以者何。此經所緣無邊故。興發無量大誓願故。攝受一切諸衆生故。莊嚴無上大菩提故。所獲福德亦復如是無有限量。若能解其義趣如說。

修行。一切諸佛於阿僧祇劫。以無盡智說其福報。亦不能盡。若有法師說
是經處。當知是中便應起塔。何以故。是真實正法所出生處故。是經隨在
國土城邑聚落寺廟精舍。當知是中即有法身。若人供養香華妓樂懸繪
幡蓋歌唄讚歎合掌恭敬。當知是人已紹佛種。況具足受持經者。是諸
人等成就功德智慧莊嚴。於未來世當得受記。決定當成阿耨多羅三藐

三菩提。

發菩提心論終

音釋

析先擊切 妙尺小切 豎子邪切 眈眈莫甸切 眈眈傍視也 羸初限切 擲陟

也。切擊

髀徒谷切 肘陟柳切 臆苦官切 胫胡定切 踝胡瓦切
髀體落侯切 肘臂節也 臆尻也 胫脚胫也 踝兩傍也

憤古對切 唵蒲拜切
憤心亂也 唵梵音也

無量壽經往生三輩。及觀經上品。俱以發菩提心爲本。菩提心者。無量壽願王所由建立。亦盡十方三世一切諸佛。所從出生也。欲求生無量壽佛國。而不發菩提心。則不爲諸佛之所護念。不克現生見佛。以與無量壽願王不相應故。與一切諸佛最初發心不相似故。予既錄天親無量壽經論。激勸往生。復從藏中檢得發菩提心論一卷。其中所列十大正願。與願生仙。大旨略同。而前後包孕事理。廣攝大乘諸經。究竟第一義諦。有志淨業者。其熟復而審思之。則菩提心之發。當有沛然莫禦者。以之回向蓮邦。上品華臺。如立竿而取影耳。一行道人彭際清書。

楊仁山居士曰。先聖設教有世間法。有出世間法。黃帝堯舜周孔之道。世間法也。而亦隱含出世之法。諸佛菩薩之道。出世法也。而亦該括世間之法。世間法局於現生。不脫輪迴。出世法透徹根源。永脫輪迴。兼之世界成壞。羣生變化。凡情所不能測者。佛門修士朗然大覺。普照無遺。豈不大快乎哉。

世俗之事謀而不成。則前功盡棄。獨念佛縱有始無終。而從前所念亦決不枉費。昔有樵夫遇虎登樹。一稱南無佛。多生多劫後猶賴之。以出家漸至成佛者。何況精誠一世乎。即或現世不能往生來世。必出生死非如世俗之讀書不就。枉費精神。經商不就。反虧貲本也。安

士全書

勸發菩提心文

古杭梵天寺沙門實賢撰

古閩翁氏醒迷子守謙校

不肖。愚下凡夫僧實賢。泣血稽顙。哀告現前大衆。及當世淨信男女等。唯願慈悲。少加聽察。嘗聞入道要門。發心爲首。修行急務。立願居先。願立則衆生可度。心發則佛道堪成。苟不發廣大心。立堅固願。則縱經塵劫。依然還在輪回。雖有修行。總是徒勞辛苦。故華嚴經云。忘失菩提心。修諸善法。是名魔業。忘失尙爾。况未發乎。故知欲學如來乘。必先具發菩提願。不可緩也。然心願差別。其相乃多。若不指陳。如何趣向。今爲大衆略而言之。相

有其八。所謂邪正眞僞大小偏圓是也。云何名爲邪正眞僞大小偏圓耶。世有行人。一向修行。不究自心。但知外務。或求利養。或好名聞。或貪現世欲樂。或望未來果報。如是發心。名之爲邪。既不求利養名聞。又不貪欲樂果報。唯爲生死。爲菩提。如是發心。名之爲正。念念上求佛道。心心下化衆生。聞佛道長遠。不生退怯。觀衆生難度。不生厭倦。如登萬仞之山。必窮其頂。如上九層之塔。必造其顛。如是發心。名之爲眞。有罪不懺。有過不除。內濁外清。始勤終怠。雖有好心。多爲名利之所夾雜。雖有善法。復爲罪業之所染汚。如是發心。名之爲僞。衆生界盡。我願方盡。菩提道成。我願方成。如是發心。名之爲大。觀三界如牢獄。視生死如冤家。但期自度。不欲度人。如是發心。名之爲小。若於心外見有衆生。度以佛道。願及願成。功勛不忘。知

見不泯。如是發心。名之爲偏。若知自性是衆生。故願度脫。自性是佛道。故願成就。不見一法離心別有。以虛空之心。發虛空之願。行虛空之行。證虛空之果。亦無虛空之相可得。如是發心。名之爲圓。知此八種差別。則知審察。知審察。則知去取。知去取。則可發心。云何審察。謂我所發心。於此八中。爲邪爲正。爲真爲僞。爲大爲小。爲偏爲圓。云何去取。所謂去邪去僞。去小去偏。取正取真。取大取圓。如此發心。方得名爲真正發菩提心也。此菩提心。諸善中王。必有因緣。方得發起。今言因緣。略有十種。何等爲十一者。念佛重恩故。二者念父母恩故。三者念師長恩故。四者念施主恩故。五者念衆生恩故。六者念死生苦故。七者尊重已靈故。八者懺悔業障故。九者求生淨土故。十者爲念正法得久住故。云何念佛重恩。謂我釋迦如來最初

發心。爲我等故。行菩薩道。經無量劫。備受諸苦。我造業時。佛則哀憐。方便教化。而我愚癡。不知信受。我墮地獄。佛復悲痛。欲代我苦。而我業重。不能救拔。我生人道。佛以方便。令種善根。世世生生。隨逐於我。心無暫捨。佛初出世。我尙沈淪。今得人身。佛已滅度。何罪而生末法。何福而預出家。何障而不見金身。何幸而躬逢舍利。如是思惟。向使不種善根。何以得聞佛法。不聞佛法。焉知常受佛恩。此恩此德。卽山難喻。自非發廣大心。行菩薩道。建立佛法。救度衆生。縱使粉骨碎身。豈能酬答。是爲發菩提心第一因緣也。云何念父母恩。哀哀父母。生我劬勞。十月三年。懷胎乳哺。推乾去濕。嚙苦吐甘。才得成人。指望紹繼門風。供奉祭祀。今我等旣已出家。濫稱釋子。忝號沙門。甘旨不供。祭掃不給。生不能養其口體。死不能導其神靈。於世

間則爲大損。於出世又無實益。兩途旣失。重罪難逃。如是思惟。唯有百劫千生常行佛道。十方三世普度衆生。則不唯一生父母。生生父母俱蒙拔濟。不唯一人父母。人人父母盡可超昇。是爲發菩提心第二因緣也。云何念師長恩。父母雖能生育我身。若無世間師長。則不知禮義。若無出世師長。則不解佛法。不知禮義。則同於異類。不解佛法。則何異俗人。今我等粗知禮義。略解佛法。袈裟被體。戒品沾身。此之重恩。從師長得。若求小果。僅能自利。今爲大乘。普願利人。則世出世間二種師長俱蒙利益。是爲發菩提心第三因緣也。云何念施主恩。謂我等今者日用所資。並非已有。三時粥飯。四季衣裳。疾病所須。身口所費。此皆出自他方。將爲我用。彼則竭力躬耕。尙難餬口。我則安坐受食。猶不稱心。彼則紡織不已。猶自艱難。我於

安服有餘。寧知愛惜。彼則葦門蓬戶。擾攘終身。我則廣宇閒庭。優悠卒歲。以彼勞而供我逸。於心安乎。將他利而潤己身。於理順乎。自非悲智雙運。福慧二嚴。檀信沾恩。衆生受賜。則粒米寸絲。酬償有分。惡報難逃。是爲發菩提心第四因緣也。云何念衆生恩。謂我與衆生。從曠劫來。世世生生。互爲父母。彼此有恩。今雖隔世昏迷。互不相識。以理推之。豈無効報。今之披毛帶角。安知非昔爲其子乎。今之蠕動蝟飛。安知不曾爲我父乎。每見幼離父母。長而容貌都忘。何況宿世親緣。今則張王難記。彼其號呼於地獄之下。宛轉於餓鬼之中。苦痛誰知。飢虛安訴。我雖不見不聞。彼必求拯求濟。非經不能陳此事。非佛不能道此言。彼邪見人何足以知此。是故菩薩觀於螻蟻。皆是過去父母。未來諸佛。常思利益。念報其恩。是爲發菩提心。

第五因緣也。云何念生死苦。謂我與衆生。從曠劫來。常在生死。未得解脫。人間天上。此界他方。出沒萬端。昇沈片刻。俄焉而天。俄焉而人。俄焉而地。獄畜生。餓鬼。黑門。朝出而暮還。鐵窟暫離而又入。登刀山也。則舉體無完膚。攀劍樹也。則方寸皆割裂。熱鐵不除飢。吞之則肝腸盡爛。洋銅難療渴。飲之則骨肉都糜。利鋸解之。則斷而復續。巧風吹之。則死已還生。猛火城中。忍聽叫嗥之慘。煎熬盤裏。但聞苦痛之聲。冰凍始凝。則狀似青蓮。藥結血肉。既裂。則身如紅藕。華開。一夜死生。地下每經萬徧。一朝苦痛。人間已過百年。頻煩獄卒疲勞。誰信閻翁教誡。受時知苦。雖悔恨以何追。脫已還忘。其作業也如故。鞭驢出血。誰知吾母之悲。豕豕就屠。焉識乃翁之痛。食其子而不知。文王尙爾。噉其親而未識。凡類皆然。當年恩愛。今作冤家。昔

日寇讐。今成骨肉。昔爲母而今爲婦。舊是翁而新作夫。宿命知之則可羞。可恥。天眼視之。則可笑。可憐。糞穢叢中。十月包藏。難過。膿血道裏。一時倒下。可憐。少也何知。東西莫辨。長而有識。貪欲便生。須臾而老病相尋。迅速而無常。又至。風火交煎。神識於中潰亂。精血既竭。皮肉自外乾枯。無一毛而不被針鑽。有一竅而皆從刀割。龜之將烹。其脫殼也猶易。神之欲謝。其去體也倍難。心無常主。類商賈而處處奔馳。身無定形。似房屋而頻頻遷徙。大千塵點。難窮往返之身。四海波濤。孰計別離之淚。峨峨積骨。過彼崇山。莽莽橫尸。多於大地。向使不聞佛語。此事誰見誰聞。未覩佛經。此理焉知焉覺。其或依前貪戀。仍舊癡迷。祇恐萬劫千生。一錯百錯。人身難得而易失。良時易往而難追。道路冥冥。別離長久。三途惡報。還自受之。痛不可

言。誰當相代。興言及此。能不寒心。是故宜應斷生死流。出愛欲海。自他兼濟。彼岸同登。曠劫殊勛。在此一舉。是爲發菩提心第六因緣也。云何尊重己靈。謂我現前一心。直下與釋迦如來無二無別。云何世尊無量劫來早成正覺。而我等昏迷顛倒。尙做凡夫。又佛世尊則具有無量神通智慧。功德莊嚴。而我等則但有無量業繫煩惱。生死纏縛。心性是一。迷悟天淵。靜言思之。豈不可恥。譬如無價寶珠。沒在淤泥。視同瓦礫。不加愛重。是故宜應以無量善法對治煩惱。修德有功。則性德方顯。如珠被濯。懸在高幢。洞達光明。映蔽一切。可謂不孤佛化。不負己靈。是爲發菩提心第七因緣也。云何懺悔業障。經言犯一吉羅。如四天王壽五百歲墮泥犁中。吉羅小罪。尙獲此報。何況重罪。其報難言。今我等日用之中。一舉一動。恒違戒律。一

餐一水。頻犯尸羅。一日所犯亦應無量。何況終身歷劫所起之罪更不可言矣。且以五戒言之。十人九犯。少露多藏。五戒名爲優婆塞戒。尙不具足。何況沙彌比丘菩薩等戒。又不必言矣。問其名。則曰我比丘也。問其實。則尙不足爲優婆塞也。豈不可愧哉。當知佛戒不受則已。受則不可毀犯。不犯則已。犯則終必墮落。若非自慙慙他。自傷傷他。身口併切。聲淚俱下。普與衆生求哀懺悔。則千生萬劫惡報難逃。是爲發菩提心第八因緣也。云何求生淨土。謂在此土修行。其進道也難。彼土往生。其成佛也易。故一生可致。難故累劫未成。是以往聖前賢。人人趣向。千經萬論。處處指歸。末世修行。無越於此。然經稱少善不生。多福乃致。言多福。則莫若執持名號。言多善。則莫若發廣大心。是以暫持聖號。勝於布施百年。一發大心。超過

修行歷劫。蓋念佛本期作佛。大心不發。則雖念奚爲。發心原爲修行。淨土不生。則雖發易退。是則下菩提種。耕以念佛之犁。道果自然增長。乘大願船。入於淨土之海。西方決定往生。是爲發菩提心第九因緣也。云何令正法久住。謂我世尊無量劫來。爲我等故。修菩提道。難行能行。難忍能忍。因圓果滿。遂致成佛。旣成佛已。化緣周訖。入於涅槃。正法像法。皆已滅盡。僅存末法。有教無人。邪正不分。是非莫辨。競爭人我。盡逐利名。舉目滔滔。天下皆是。不知佛是何人。法是何義。僧是何名。衰殘至此。殆不忍言。每一思及。不覺淚下。我爲佛子。不能報恩。內無益於己。外無益於人。生無益於時。死無益於後。天雖高。不能覆我。地雖厚。不能載我。極重罪人。非我而誰。由是痛不可忍。計無所出。頓忘鄙陋。忽發大心。雖不能挽回未運於此時。決

當圖護持正法於來世是故偕諸善友。同到道場。述爲懺摩。建茲法會。發四十八之大願。願願度生。期百千劫之深心。心心作佛。從於今日。盡未來際。畢此一形。誓歸安養。旣登九品。回入娑婆。俾得佛日重輝。法門再闡。僧海澄清於此界。人民被化於東方。劫運爲之更延。正法得以久住。此則區區眞實苦心。是爲發菩提心第十因緣也。如是十緣備識。八法周知。則趣向有門。開發有地。相與得此人身。居於華夏。六根無恙。四大輕安。具有信心。幸無魔障。況今我等。又得出家。又受具戒。又遇道場。又聞佛法。又瞻舍利。又修懺法。又值善友。又具勝緣。不於今日發此大心。更待何日。唯願大眾。愍我愚誠。憐我苦志。同立此願。同發是心。未發者今發。已發者增長。已增長者今令相續。勿畏難而退怯。勿視易而輕浮。勿欲速而不久長。勿懈

怠而無勇猛。勿委靡而不振起。勿因循而更期待。勿因愚鈍而一向無心。勿以根淺而自鄙無分。譬諸種樹。種久則根淺而日深。又如磨刀。磨久則刀鈍而成利。豈可因淺勿種。任其自枯。因鈍弗磨。置之無用。又若以修行爲苦。則不知懈怠尤苦。修行則勤勞暫時。安樂永劫。懈怠則偷安一世。受苦多生。况乎以淨土爲舟航。則何愁退轉。又得無生爲忍力。則何慮艱難。當知地獄罪人。尙發菩提於往劫。豈可人倫佛子。不立大願於今生。無始昏迷。往者既不可諫。而今覺悟。將來猶尙可追。然迷而未悟。固可哀憐。苟知而不行。尤爲痛惜。若懼地獄之苦。則精進自生。若念無常之速。則懈怠不起。又須以佛法爲鞭策。善友爲提攜。造次弗離。終身依賴。則無退失之虞矣。勿言一念輕微。勿謂虛願無益。心眞則事實。願廣則行深。虛空非大。


心王爲大。金綱非堅。願力最堅。大衆誠能不棄我語。則菩提眷屬從此聯姻。蓮社宗盟自今締好。所願同生淨土。同見彌陀。同化衆生。同成正覺。則安知未來三十二相。百福莊嚴。不從今日發心立願而始也。願與大衆共勉之。幸甚幸甚。

勸發菩提心文

(終)

佛

印光法師曰一切佛經及闡揚法諸書無不令人趨吉避凶改過遷善明三世之因果識本具之佛性出生死之苦海生極樂之蓮邦讀者必須生感恩心作難遭想淨手潔案主敬存誠如面佛天如臨師保則無邊利益自可親得若固執管見妄生謗毀則罪過彌天五報無盡矣



無	所	權	版
印	翻	人	任

如 見 同 願
佛 佛 生 同
度 了 極 念
一 生 樂 佛
切 死 國 人

品	賣	售	非
道	同	送	敬

2

102230